

粵雅堂叢書

粵雅堂叢書

樓山堂集第二十一卷

貴池吳應箕著

詩

五言古

立秋

壬戌

五載屆斯辰風塵悵擾攘今茲肅高居忽復逢秋爽微  
雨洗繁林輕颺蕩纖幌庭植相與鮮煩襟亦以盪憩松  
悅沈陰撫流弄新響清商未央來積暑漸以往宿志耽  
墳籍欣承氣清朗把卷欲忘言散髮酬心賞

初夏齊山示王子兄弟

自注王心睿心介甲子

茲山託梓里相期可白首浪遊古宣州念茲若良友懷  
深忽言旋挈侶脩朋酒輕飈散鬱埃朝爽傾新柳背郭  
信委紆摧華疊培塿下藉湖波盈沆瀣空靈藪捫磴歷  
亭際洞壑勢如誘移瞬變雲巒觸趾列戶牖何境不相  
習一來一領受舊乘紀泉巖大小九十九靈跡半夷淹  
窮情莫能剖造化示明滅山川幻無有昧者遵所聞日  
與躋攀紐嗟我亦耽奇眺矚良不偶流連片石閒對之  
嘯咏久譬彼賞駿人意在略牝牡吾子許掾徒相與重

攜手逡覽極蒼茫蕩滌塵纓否

雨後咏懷

羲轡騁脩途煊炎布塵溽羣卉就鬱蒸膚節就械桔喬  
林無沈陰瓶秀鮮積綠譬彼焚岡虐乃不區石玉有弁  
倏興雲驅雨洗煥毒簷際無停注盈溜漾堦淥須臾散  
清霽涼颼相委屬蒼翠發遠岫縹碧紛綴續亭午前後  
分視昔罔餘酷憔悴易爲德感茲無異局軒宇豁以敞  
曠懷類若觸人生審變態胡乃苦跼促晞髮試微吟欣  
然成麗矚

自大剡谿望橫山諸峯

自注谿山在高田之黃山源

方秋理勝情窮都展高眺距今三望舒清夢猶爲繞而  
我觀茲山曩遊翻見少奇秀時復遭無如此幽窅天外  
削不成雲中青未了疑或誰仙人行空幻窈窕鄰壤有  
九子峯峯挈之小藉甚胡獨名徒以臨江表俗情鮮特  
達勝區資介紹安知劉南陽中懷非獨矯諒哉金石鏗  
斯爲得要眇

寄李達丁煜劉城

乙丑

世途不可問引覽天宇闊胡以凌霄姿羣然迴秋翮在

笈齊鳳雉同揉律玉石我苦歎索居懷人觸幽蹟往訓  
激綢繆勞勞徵三益雅誼有同申睽悵無時數日新各  
黽勉音塵慰遙積眷言寄鄒吹綢緼滿衡席

初秋湖中

非注池州城東

城棲強半湖日涉不知倦耳目恣清越探領各以見節  
候倏又更景物如乘傳寒光洗夏威遠影涵平練短棹  
信夷猶極浦欣周徧氣類視所宜誰云樂荒宴

關江磯水落見石出蔽江

非注在池州西南六十里

肅肅霜氣晶嚴飈吹寒驛有友理淮駕解纜溯江磧曩

予嘗泛茲巨濤相崩濤惟時盛夏秋水力與磯逆今也  
殺其怒石出胥攢積江流信灝淼斂浪穿罅隙嶙峋狀  
以千互江森交戟偃者若蹲視矗者紛立壁大已蔽象  
軀小亦攤鵠翮周遭未移瞬對之增浩惜攬勝驚逝波  
安渡忻挂席夷險感物情漲涸悵今昔

固始道中見林曲似秋浦道上

于邁忽踰旬每發遵初旭如何厯郭邑肅然鮮麗矚茲  
爲山水遊解轡緩予于疎烟滌叢條明沙漾深曲我思  
秋浦秋境會因類觸遠眺極蒼茫塵襟如盪浴遊壯匪

倦梁道險毋難蜀行行顧僕夫前路欣相勗

兩明府詠

有序

梁王兩公先後令吾邑皆以國士相遇後兩公  
繼逝予亦屢報罷丁卯歸偶簡舊籍見兩公所  
評應制文爲之增悼車過腹痛寓于篇章梁名  
夢濬順德人王名榮棠石首人

嶺南梁公來秉道方高素爲令澹聲華好士急詞賦菲  
文辱深鑒矍然國士遇冰照旣委塵霄姿亦鍛羽感時  
驚逝川陳書悲宿露躑躅昂長鳴甯忘市中顧

王侯綰綬時疑是羣真謫爲政厲劓新丁奏泯竅卻朝  
案無畱牘夕榻欣莫逆詎知誤一鳴謂勝羣鳥百被褐  
亦已徒十年悲抱石山河歎緬邈霄泥深跼踖攬舊腹  
輪摧城頭悵姑射

得蔣臣書問却寄

日暮城西頭飛雲瞥遠昊我思方鬱盤省書申交道流  
落非所悲矜愼各華藻憶昨都市遊豈不抗懷抱一爲  
鍛羽分彼此慕幽討黃金鑄平仲紉結賤楚草持此感  
人多詎復替音好深山緬烟霧大江阻淼灝安得數晨

夕杯酒宜積懊聞當理嵇駕庶以徑自掃

同諸從春郊

大造舒羣物春風被窈窕端居鮮懽情結侶恣幽討碧  
色靜如洗脩條輕以嫋清氣適我襟好音睨彼鳥選席  
佇休暇飛觴吐綿綯高咏激微風發聲盪林杪粲然羣  
族士抗懷躋雲表

出塞

自注時口口都門

旣出關塞卒豈不慕封侯用兵已十載誰能斬一酋一  
自遼陽失徒聞聖主憂笳吹不在邊燔燧滿郊疇卽有

傅介子倉卒安所求

廟算未爲失將軍懦且驕兵敗飾虛級繇來非一朝  
□今充斥軍乘誰能超穴中不撲鼠況逐焉支遙難可  
徼天幸身從霍嫖姚

書生能料敵今或非其人天聽一時誤三軍化作燐牛  
羊驅婦女匝地含悲辛豈無諸上將雲翔何逡巡使我  
空荷戈氣噉不能伸一馳秦軍死千秋難比倫

魯連但一身引義秦師卻微虎三百人能張魯積弱堂  
堂天子帥赫赫九軍幕□□日縱橫我戰何消索縋城

召元戎夜半咨籌畫賂□良非虛何敢望俘馘  
生別莫哀歎死別莫歔歔從軍十數載戰陣幾人歸士  
命不足重所惜在國威白骨知誰掩而盼寄寒衣

寄羅文止

萬藻

臨川無恆士精脩有之子結髮覲徽章惜誦中懷委王  
風久沈淪誼談不再起我嘗聆音歎古人無遼邇山川  
阻以長媒拙因弱理願爲廬瀑泉瀉入彭蠡水水流不  
別區赴海相依止大義嚴雲日神交卑蘭芷谷音豈徒  
然毋忘天子使

正月二十日湖中閣上看雪

非注在池州湖心寺

散步登湖閣寒威入簷聚天地晝冥冥雲水相吞互雪  
勢信葳蕤氤氲起濃霧壑堵沒曾景潭鑒失飛鷺高覽  
亦何極虛無恍若遇介性苦清嚴脆質恃烝煦安知布  
青陽蕭條不易故歲寒未可捐持貞□悰悰

夜夢登太華失路遇老僧問韓昌黎所至處

生平覽圖傳諸嶽交胸襟俗軫日分薄勝情增遐心晦  
息方窈窕結轡出華陰曾雲袖吐納踏步抗崆峒對岐  
苦惆悵霜瞿感素欽導跡經幽壑窅窅松霧深逶迤絕

塵軌縹緲凌霞林揖僧仰前哲霄徑邈登臨二京垂帶  
視三峯欣盍簪雲嶠倏冥漠壁立怖千尋霍然驚一寤  
晨鐘已發音

與劉伯宗

城

共泛玉鏡潭

非注潭當在清溪志誤  
注於秋浦

暮春厯敬亭十年欣寤寐迴車念秋浦勝情日攢至絕  
壑稱鏡潭清流瀉蒼翠理棹泝源深澄徹洗心意雲起  
林與浮波平天如墜烟雨四時秋物象一朝異右軍爲  
廣聞康樂窮高致與子夙風期今昔無殊視願言謝朱  
明攀躋恣謔戲覓津有苗裔南陽同子驥

平湖舟中坐月

孤舟今夜坐月色娟娟好四野生靜觀深宵助幽討紛  
綸十日遊感茲恬以掃皎然照太古川雲同不老光遠  
自他及氣虛以生顥涼襟起閨惻微風瀉哀擣羣動資  
晦息羈人賁遠抱廓然視無際庶以清夢考

西湖贈張天生

元

馮千秋

延年

袁則學

師孔

長雲互千里必以觸石出眾流各翔躍靡不望海至應  
求匪二理懷人發長喟夙昔契三子笑言形寤寐祝緘  
旣心勞誦章亦意委欣當湖上遊析肝以相視長揖罄

生平宣遊浹氣嗜願言各慷慨勉敦昔士義杯酒日相  
造蕩莽秋烟寄雜合杳難期毋忘聚以類

旅中偶感

豈有世閒傑碌碌空爾爲乞交與借知志士羞稱之聖  
人有深戒舍龜而觀頤予亦秉氣烈茲言矢不遺一日  
沈淪久願言遭未隨中夜起長歎懍烈生遐思顧瞻宇  
宙閒升墜視所持時哉不可問悠悠安足知綢繆假顏  
色毋乃受其嗤甑墮不足惜竈滅可還炊貞素非奇節  
願以靜自貽